



Droga je zlo – razlozi, posljedice i metode liječenja (Meka)

Hatib: dr. Abdullah ibn Avad el-Džuheni

15. ševval 1444. po Hidžri / 5. maj 2023.

Hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji nema druga, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik. Allahu moj, smiluj se, blagoslovi i spasi Svog roba i poslanika, našeg vjerovjesnika Muhammeda, sallallahu alejhi ve sellem, i njegovu časnu porodicu.

Uzvišeni kaže: "O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!" (Ali Imran, 102)

"O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, čijim imenom jedni druge molite, i čuvajte rodbinske veze. Allah vas, doista, nadzire." (En-Nisa, 1)

"O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio." (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su novouvedene stvari, a svaka novouvedena stvar u vjeru je novotarija, svaka novotarija je zabluda, a svaka zabluda vodi u Vatra.

Oporučujem sebi i vama bogobojažnost, onaj ko se opskrbi bogobojažnošću, nikada neće duhovno ogladnjeti, onaj ko se zaodjene njenom odjećom, nikada se neće obnažiti, onaj ko se ukrasi njenom ljepotom, nikada neće oronuti i onaj ko njenom





robom bude trgovao, nikada neće propasti. Bojte se Allaha, u tajnosti i javnosti, On vas, zaista, vidi, čuje vaš govor i zna šta vaša prsa kriju i šta u javnosti iznosite. Znajte da je ovaj dunjaluk kuća prolaznosti, a ne kuća trajnosti, i kuća tuge, a ne kuća sreće. Onaj ko ga je spoznao, neće se previše radovati zbog njegovih blagodati, i neće previše tugovati zbog njegovih nedaća. Allah je učinio dunjaluk kućom iskušenja, a ahiret kućom nagrade. Učinio je dunjalučka iskušenja uzrokom ahiretske nagrade, a ahiretsku nagradu utjehom za dunjalučka iskušenja. On uzima da bi dao, i iskušava da bi nagradio.

O muslimani, jedna od najvećih Allahovih blagodati čovjeku jeste blagodat razuma, koji mu pomaže da ispravno razumijeva stvari, proniče u njihovu suštinu i razlikuje korisno od štetnog. Razum je temeljna odlika čovjeka u odnosu na druga bića, i on je epicentar svih dešavanja. Šerijatska obveznost (teklif), u najužem smislu, uvjetovana je razumom. Pomoću razuma razlikujemo naredbe od zabrana, istinu od laži i spoznajemo uzroke i posljedice stvari. Zato se od čovjeka traži da ovaj veliki Božiji dar koristi u onome za što je i stvoren – obožavanje Allaha, da ga on vodi onome što će mu koristiti na ovom i budućem svijetu i da, pomoću njega, prepozna one koji mu nanose štetu te ih se kloni. Razum je čovjekov dragulj i nešto najvrednije što posjeduje. Njime se razlikuje od životinje. Kada bi se bilo kojem čovjeku, bar na jedan trenutak, desilo i najmanje oštećenje u mozgu/razumu, on bi sigurno učinio sve što je u njegovoj moći da to oštećenje sanira ili otkloni, makar se to desilo samo jednom u godini.

Šta onda reći za ljude koji svojevolumno i od svog novca kupuju ono što može oštetiti njihov razum? Šta reći za one koji kupuju i konzumiraju drogu, za koju se dokazano zna da umrtvljuje osjećaje i čovjeka dovodi u stanje bunila i nerazgovijetnog govora? U tom bunilu može kazati bilo šta, vrijeđati i psovati sebe, Allaha, svoje roditelje, najbližu rodbinu ili bilo koju osobu. Zar nije tako? Osoba pod dejstvom droge ne zna šta radi, može učiniti bilo koji prijestup, uništiti imetak, pa čak i ubiti nekoga, ili nasrnuti na sebi najbližu i navoljeniju osobu, a da uopće toga nije svjesna. Također, pod dejstvom droge, zaboravlja na Allaha i zapostavlja svoje obaveze prema Njemu,





prije svih namaz. Sve su to zlodjela, grijesi i štetne posljedice konzumiranja droge. Zato je upotreba opojnih supstanci najstrože zabranjena u Kur'anu i Vjerovjesnikovom sunnetu.

Ono što je novina na ovom polju jeste pojava novih vrsta droga, poznatih kao "šabu" (ulični naziv za jednu od najčistijih formi metamfetamina) ili kristal-met, ili kako ih još zovu "šejtan svih droga", zbog njihovog razornog dejstva. Prema stručnjacima, "šabu, odnosno kristal-met, ima deset puta razornije djelovanje i brže stvara ovisnost od kokaina, marihuane i drugih droga, i ostavlja teške posljedice po ljudsko tijelo i razum, ukoliko zahvate nervni i druge sisteme u tijelu".

Neprijatelji islama, ljudi slabog karaktera i šejtanovi pomagači nastoje proširiti ovo opako zlo među muslimanskim narodima, kako bi uništili njihovu mladost, udaljili ih od pravog puta i pridržavanja uputstava njihove časne vjere.

Ono što svakako pomaže u suzbijanju ove opasne devijacije jeste šira edukacija društva o njenim stvarnim posljedicama i štetnostima, podsticaj građanima da budu maksimalno odgovorni u dostavljanju svih korisnih informacija nadležnim institucijama o trgovcima drogom i konzumentima, povećana briga roditelja za njihovu djecu, kroz odgoj, edukaciju i pravovremeno upozoravanje na opasnost lošeg društva i uključenost kompletnog društva u aktivnosti suzbijanja i sprečavanja njenog širenja među mladima i upoznavanja nadležnih institucija o svim važnim detaljima koji se tiču ovog problema.

Allah zaštitio majke, očeve i njihovu djecu od svih oblika devijantnog ponašanja i djelovanja!

Bojte se Allaha, o muslimani, razmišljajte o smutnjama, nemirima i previranjima koji se dešavaju svuda oko vas, ali i o njihovim uzrocima i korijenima, a zatim pogledajte kakvo je stvarno stanje vas kao pojedinaca, vaših zajednica i vaših međusobnih odnosa.





Bojte se Allaha po pitanju vas samih, vašeg naroda i vaših domovina. "I izbjegavajte ono što će dovesti do smutnje koja neće pogoditi samo one među vama koji su krivi, i znajte da Allah strašno kažnjava." (El-Enfal, 25)

Sreća, čast i dostojanstvo islamskog ummeta temelje se na ispravnom vjerovanju, lijepom ponašanju i dobroti.

O vjernici! Uzvišeni Allah naredio nam je da donosimo salavate i selame na Njegovog Poslanika, pa je rekao: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Poslanik, sallallahu alejhi ve sellem, rekao je: "U čijem prisustvu budem spomenut, neka donese salavat na mene. Onaj ko na mene donese jedan salavat, Allah će na njega donijeti deset salavata."

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

